

7. oktober 2016

Inatsisartut aalajangiiffigisassaattut siunnersuutigineqarpoq, Naalakkersuisut peqquneqassasut danskit oqartussaqaarfiinut attaveqassasut Aalborgimi Grønlandshavnimiit Kalaallit Nunaannut umiarsuakkut nassiussassat tamarmik hashitaqannginnersut akitsuuserisunit misissorneqartarnissaat qulakkeerumallugu aalajangersimasumik Grønlandshavnimi akitsuuserisoqartitsilersinnaanerup siunnerfigineqarnissaa.

(Inatsisartunut ilaasortaq Steen Lyngé, Atassut)

Inatsisartuni ilaasortap Steen Lyngé Atassummeersup aalajangiiffigisassatut siunnersuutaanut qujavugut, imaattumillu Siumumiit oqaaseqaateqassuugut.

Siumumiit isertuaatsumik oqaatigiuarsimasarput tassaavoq ikiaroorartuq akuersaangilluinnarsigut. Taamaattumillu Siumumiit annertuumik nuannaarutigisarpaarput sukkulluunniit ikiaroorartup akiorniarneqarneranut suliniutit suliniutigerusutallu oqallisissanngorlugit inuiaqatigiinni qaqqinneqaraangata.

Nunatsinni ikiaroorartup atugaanerujussuata killilersimaartinneqarnissaanut akiuiniarnermut tunngatillugu suliniutissat pingaernerit marluusut, tassalu anngiortumik eqqussuinerup killilersimaarnissaa kiisalu inuiaqatigiinni atornerluinerup nungutikkiartuaarnissaanut suliniutit tamaasa Siumumiit oqaloqataaffigalugillu iliuuseqaqataaffigerusukkatsigik matumani oqaatisissassatta pingaarnersaraat.

Ikiaroorartup nunatsinni atugaanerujussuanik nungutitsinissamik oqaluttoqassappat piviusorsior-tuunani neriuutigineqaannartariaqarneranik oqariartuuteqarneq piviusorsior-tuuvoq Siumumiit oqaatigissallugu. Atornerluisuunermut ingalassimatitsinnaasut soorlu katsorsaanerit, qaammarsaanerit pitsaaliuinerillu allat tassaapput siunissami aningaasaliiffigiuagassat pingaernerit ilaat. Taakkualu suli ukiumi aggersuni pingaartilluinnarqissaarlugit suliarnissarput Siumumiit naqissuserumavarput.

Taamaappoq aamma anngiortumik ikiaroorartumik eqqussuinerup ingalassimatinnissaanut suliniutit ingerlaannarnissaannik qulakkeerinninnissaq nutaaliortuarnissarlu. Pingaaruteqarpoq anngiortumik eqqussuiffiusinnaasut tamaasa nakkutigilluarnissaat, taamaaliornikkut killilersimaarinninneq annertoq pilersinneqarsinnaammat.

Siunnersuuteqartup siunnersuutigaa Naalakkersuisut peqquneqassasut danskit oqartussaqaarfiinut attaveqassasut Aalborgimi Grønlandshavnimiit Kalaallit Nunaannut umiarsuakkut nassiussassat tamarmik hashitaqannginnersut akitsuuserisunit misissorneqartarnissaat qulakkeerumallugu aalajangersimasumik Grønlandshavnimi akitsuuserisoqartitsilersinnaanerup siunnerfigineqarnissaa.

Siumumiit pingaartilluinnarparput anngiortumik eqqussuiffiit kiisalu aallaaviusinnaasut tamaasa pitsaanerpaamik nakkutigineqarnissaat. Aalajangiiffigisassatulli siunnersuut manna Aalborgimi Grønlandshavnimut kisiat tunngassuteqartinneqarnera pissutigalugu siunnersuut Siumumiit ilalernartinningsigut matumani oqaatigissavarput.

Nuna tamakkerlugu pilersaarusiamut nassuiaat qanittumi Inatsisartuni oqaluuserineqartussami ilaattigut erseqqissumik allassimavoq nunatta umiarsualiveqarnikkut attaveqaateqarnikkullu aqqissuu-

saanera allanngortinneqartariaqarneranik pisariaqartitsiffiusoq. Umiarsualiviit eqqarsaatigalugit massakut tamatigoortumik umiarsualiveqarnissaq anguniagaavoq. Tamassumalu ilaatigut kingunerissagaa takorluugaavoq Aalborg Havn ullumikkutut ingerlatsinermi Kalaallit Nunaanni piler-suinermi tamani pingaarnertut atugaasoq atorunnaarneqassasoq, misissuinerillu maannamut ingerlanneqartut ilimanarsitippaat umiarsuaatileqatigiiffiup Island annertunerusumik suleqatigilissagaa.

Siunniussat taakkuinnaalluunniit pissutissaqalersippaatigut aalajangiiffigissassatut siunnersuut manna ilumut annertuumik aningaasaliiffigissallugu pissutissaqarnerisq. Siumumiit isumaqarpugut naamik.

Siumumiit taamatut tunngavilersuuteqarluta oqariartuuteqarlutalu siunnersuutip massumap itigartitsissutigineqarnissaa inassutigaarput.

Anders Olsen
Siumut